

**ՔԱՐԹԼԻ-ԿԱԽԵԹՈՒՄ ՀԱՅ ԲՆԱԿՉՈՒԹՅԱՆ
ՆՈՐ ԽՄԲԵՐԻ ՀԱՍՏԱՏՎԵԼՈՒ ՔԱՂԱՔԱԿԱՆ ՈՒ
ՏՆՏԵՍԱԿԱՆ ՆԱԽԱԴՐՅԱԼՆԵՐԸ**

ԼԻԼԻԹ ՄԵԼԻՔՅԱՆ

Բանալի բառեր - Վրաստան, Հայաստան, Լենկ Թեմուր, տնտեսություն, առևտուր, Տփղիս, գաղթ, ձեռագիր հիշատակարաններ, եկեղեցական փաստաթղթեր:

ՄՈՒՏՔ

XIV-XV դդ. ընթացքում Հայաստանը եւ Վրաստանը ակամա ներքաշվեցին մոնղոլական տերության՝ Ոսկե Հորդայի եւ Լենկ Թեմուրի ստեղծած պետության պայքարի մեջ: Քննարկվող ժամանակաշրջանում Հայաստանում արտաքին ազդեցությունների դրսևորմամբ ստեղծվում են կեցության համար անտանելի պայմաններ: Սոցիալ-տնտեսական և քաղաքական առավել բարենպաստ պայմանների ակնկալիքով հայերը զանգվածաբար հեռանում են հայրենիքից՝ բնակություն հաստատելով տարբեր երկներում այդ թվում՝ Վրաստանում, մասնավորապես, Քարթլի-Կախեթում:

Խոսելով Քարթլի-Կախեթում հայերի հաստատման նախադրյալների մասին պետք է նախևառաջ նկատի ունենալ Արևելյան Վրաստանի և նրա քաղաքների քաղաքական և սոցիալ-տնտեսական իրավիճակը և դերը նվաճողների համար: Մեզ համար առանձնահատուկ նշանակություն ունի հայ նոր գաղթականների նկատմամբ վրաց թագավորների վարած քաղաքականության, տեղում նորաբնակ հայերի հաստատման և գործունեության պարզաբանման խնդիրները: Հետազոտողները այդ ժամանակաշրջանի պատմությունը լուսաբանելիս առայժմ առանձնակի ուշադրություն են դարձրել միայն Լենկ Թեմուրյան արշավանքներից հետո Հայաստանի և Վրաստանի սոցիալ-տնտեսական և քաղաքական կյանքի նկատմամբ: Հետևաբար չենք կարող քննության նյութ չդարձնել Վրաստանի հայկական գաղթօջախի տվյալ պատմափուլը, որը կարևոր դերակատարում ունեցավ համայնքի սովարացման և զարգացման տեսանկյունից:

**ՍՈՑԻԱԼ - ՏՆՏԵՍԱԿԱՆ ԵՎ ՔԱՂԱՔԱԿԱՆ ԿԱՅՈՒԹՅՈՒՆԸ
ՀԱՅԱՍՏԱՆՈՒՄ ԵՎ ՎՐԱՍՏԱՆՈՒՄ XIV ԴԱՐԻ 30-ԱԿԱՆ ԹԹ. - XV
ԴԱՐԻ ՎԵՐՋԻՆ**

XIV դարի 30-ական թվականներից Վրաստանն աստիճանաբար դուրս է գալիս մոնղոլական տիրապետությունից¹: Այս շրջանը համընկնում է Դեմետրե II Անձնուրացի որդի Գիորգի V արքայի (Գեորգի Պայծառափայլ՝ 1314/1318–1346 թթ.) իշխանության տարիներին: Գեորգի V-ը մինչև 1314 թ. Դավիթ Նարինի անչափահաս որդի Գեորգի VI-ի խնամակալն էր, սակայն 1314 թ. նա ասպարեզից հեռացնում է անչափահաս եղբորորդուն և գրավում գահը²: Մոնղոլները Գիորգի V-ին հանձնեցին հարկերը հավաքելու իրավունքը, որը չափազանց կարևոր ձեռքբերում էր. վերջ էր տրվում մոնղոլական հարկահավաքների, հատկապես՝ հարկերը կապալով վերցնող պաշտոնյաների կամայականություններին ու չարաշահումներին: Միջոցառումներ իրականացվեցին երկրի տնտեսական վիճակը բարելավելու, ֆինանսական հզորությունը ամրապնդելու նպատակով³: Եւ չնայած Վրաստանի քաղաքային կյանքը ևս ճգնաժամի մեջ էր, մի շարք քաղաքներ շարունակում էին մնալ որպես տնտեսական կենտրոններ: 1328 թ. Հռոմի Հովհաննես XXII պապը Տփղիսի մասին գրում էր հետևյալը. «Երկար խորհրդակցությունից և ուսումնասիրությունից հետո մենք և մեր եղբայր կարդինալները համոզվեցինք, որ Տփղիսը՝ Վրացական թագավորության կենտրոնը, հանդիսանում է ամենալավ, նշանավոր, խիտ բնակեցված, հարմար և հարուստ քաղաք... այդ իսկ պատճառով Ջմյունիայից [Սմիրնայից] եպիսկոպոսությունը տեղափոխում են նվաճած քաղաք՝ Տփղիս»⁴: Հայտնի է, որ Տփղիսը XIV դարում շարունակում էր գտնվել Մերձավոր Արևելքից դեպի Արևմուտք՝ Սուլթանիե – Ղարաբաղ – Պարտավ (Բարդա) – Գանձակ (Գանջա) – Շամքոր –

¹ Հմմ. **Н. А. Бердзенишвили**, Очерк из истории развития феодальных отношений в Грузии в XIII-XVI вв., Тбилиси, 1938, с. 12.

² Ըստ **Վ. Կիկևաձեի**՝ Գեորգի Պայծառափայլի գահակալության սկիզբ պետք է համարել 1318 թ., քանի որ 1314-1317 թթ. Օլջեյթու խանի աջակցությամբ գահ էր բարձրացել Գեորգի VI-ը: Տե՛ս Յ. Կոքնաձե, XIV საუკუნის დასაწყისის საქართველოს ისტორიიდან (გიორგი V-ის გამეფების თარიღი), საქართველოს სსრ მეცნიერებათა აკადემიის მაცნე, 1983, № 2, გვ. 178-188.

³ Հայաստանի հարակից երկրների պատմություն, հտ. II, Երևան, 2016, էջ 68:

⁴ **Յ. Թამარაშვილი**, ისტორია კათოლიკობისა ქართველთა შორის ნამდვილის საბუთების შემოტანითა და განმარტებით XIII საუკუნიდგან ვიდრე XX საუკუნემდე, ტფილისი. 1902, გვ. 32.

Տփղիս տարանցիկ ուղու վրա¹, հետեւաբար նվաճողների կողմից Վրաստանը դիտվում էր, որպես համաշխարհային առեստրին մասնակից դառնալու կարելու գործոն: Այս հանգամանքով կարելի է բացատրել Տփղիսի եւ վրացական քաղաքների (գլխավորապես Արեւելյան Վրաստանի) մի մասի ամբողջական ավերածությունից գերծ մնալու փաստը: XIV դարում վրացական քաղաքների մի մասը՝ Գորի, Քութայիսի, Դմանիսի, Ախալցխա եւ այլք, հիմնականում շարունակում էին իրենց ակտիվ գործունեությունը²: Վրաստանի ներքին ու արտաքին համեմատաբար բարենպաստ իրավիճակը պահպանվեց Դավիթ IX-ի (1346-1360 թթ.) եւ նրա հաջորդ Բագրատ V-ի (1363-1393 թթ.) օրոք:

Հայաստանը շարունակում էր գտնվել մահմեդականների ամբողջական տիրապետության տակ³: Մնացյալ հայ ֆեոդալական ուժերը հազիվ էին պահպանում իրենց գոյությունը, եւ արդյուքնում գերիշխանությունն անցնում է մահմեդական իշխանությունների ձեռքը⁴: Այսպես 1349 թ. ձեռագրի հիշատակարանում կարդում ենք. «Անկաւ սով սաստիկ, կոտորեցան յերից մասանց Հայոց աշխարհս եւ յետ սովուս մխիթարութեան եհաս աստուածասաստ բարկութին ի վերայ մեր եւ անկաւ մահ տարածամ յամենայն աշխարհս...»⁵: Առեստրի ու արհեստների ծաղկուն կենտրոններ հանդիսացող բազմաթիվ մարդաշատ քաղաքները վերջնականապես զրկվեցին արեւելյան եւ արեւմտյան երկրների հետ իրենց երբեմնի առեստրական սերտ կապերից: Ծանր հարկերը եւ պաշտոնյաների կեղեքումներն այնպիսի դրություն էին ստեղծել հայերի համար, որ բնակչության մի ստվար զանգված ստիպված եղավ գաղթել օտար երկրներ⁶, այդ թվում՝ Քարթլի-Կախեթ (Արեւելյան Վրաստան):

XIV դ. վերջին քառորդում Հայաստանը եւ Վրաստանը ենթարկվում են Լենկ Թեմուրի ավերիչ հարձակումներին: 1386 թ. գարնանը նրա զորքերն առաջին անգամ արշավում են Հայաստան⁷:

¹ Ըստ մահմեդական աղբյուրի՝ Տփղիսը կապված էր Արեւելքից Արեւմուտք ընթացող ճանապարհի հետ (Սուլթանիա-Կարաբագ-Բարդա-Գանջա-Շամխոր-Տփղիս), տե՛ս The geographical part of the Nuzhuat-al-qulub composed by Hamdallah Mustawfi of Qazwin in 740 (1340), London, 1915, p.182.

² III. Месхия, Города и городской строй феодальной Грузии (XVII-XVIII вв.), Тбилиси, 1959, с. 53.

³ Հ. Մանանդյան, Քննական տեսություն հայ ժողովրդի պատմության, հտ III, Երեւան, 1977, էջ 333:

⁴ Տե՛ս Թովմա Մեծովեցի, Պատմագրություն, Աշխատասիրությամբ Լ. Խաչիկյանի, Երեւան, 1999, էջ 117-118:

⁵ ԺԴ դարի հայերեն ձեռագրերի հիշատակարաններ, Կազմեց Լ. Ս. Խաչիկյան, Երեւան, 1950, էջ 375:

⁶ Հ. Մանանդյան, նշվ. աշխ., էջ 334:

⁷ Տե՛ս նույն տեղում, էջ 356:

Թովմա Մեծոփեցու հաղորդմամբ՝ «Եւ զայլ ամեն այն բազմութիւն հաւատացելոցն չարչարեալ տանջէին սովով, սրով, գերութեամբ, անտանելի չարչարանօք եւ անագորուն բարուք. անմարդաձայն արարին զամենալից գաւառն Հայոց»։ Պատմիչն ապա նշում է, որ այստեղից. «Եւ ընթացեալ բազում զօրօք ի Փայտակարան Տփղիս քաղաք՝ էառ զնա եւ գերեաց անթիվ եւ անհամար»¹։ Լենկ Թեմուրի զորքերը տեսական պաշարումից հետո գրավում են Տփղիսը եւ գերի վերցնում այնտեղ ամրացած Բագրատ V-ին²։ Բագրատին հաջողվում է առերես իսլամ ընդունելով եւ Թեմուրից խորամանկությամբ զորք վերցնելով վերադառնալ Վրաստան՝ իբրեւ թէ այն Թեմուրին հնազանդեցնելու համար։ Հասնելով Վրաստան՝ նա այդ զորքերը գցում է նախապես իր որդիների կողմից պատրաստած ծուղակը եւ ոչնչացնում դրանց³։ Դրան հաջորդում է Թեմուրի պատասխան արշավանքը (1387թ.), որով վերջինս հաշվեհարդար է տեսնում Բագրատի հետ՝ կոտորելով բնակչությանը, ավերելով բնակավայրերը եւ քանդելով եկեղեցիներն ու վանքերը։ Այս մասին որոշակի տեղեկություններ են պահպանվել նաեւ վրացական աղբյուրներերում. «Մեծ Բագրատ թագավորն ու Թեմուրը պայքարել էին, Թեմուրը հաղթահարեց, Տփղիսը գրավեց, Քարթլին ոչնչացրեց եւ քանդեց բոլոր եկեղեցիները, բերդերն ու կառույցները»⁴։

Թեմուրի նոր արշավանքների նպատակը Հյուսիսային Կովկասն էր, որտեղ Ոսկե Հորդայի դեմ պատերազմը շարունակվեց նոր թափով։ Այդմ՝ 1395 թ., չնայած Գեորգի VII-ի (1393-1403 թթ.)⁵ համառ դիմադրությանը, Թեմուրը նորից ներխուժում է Վրաստան եւ ավերածություններ գործում հարավ-արեւելյան շրջաններում⁶։ Ըստ «Վրաց հուշարձանի» տեղեկության. «[Թեմուրը]... այրեց ու ավերեց ամբողջ Վրաստանը, եւ ցրեց մեռելների դիակները, ինչպես խոտի մի խուրձ»⁷։ Գեորգի VII-ի օրոք Լենկ Թեմուրի դեպի Վրաստան արշավանքի մասին հակիրճ հիշատակվում է նաեւ 1447 թվականին Գեորգի VII-ի (1446-1466 թթ.) եւ Ալեքսանդր I-ի

¹ Թովմա Մեծոփեցի, նշվ. աշխ., էջ 19-21։

² Հայաստանի հարակից երկրների պատմություն, հտ. II, էջ 336։

³ Թովմա Մեծոփեցի, նշվ. աշխ., թ. 21։

⁴ Թ. Ժորճանյան, յրօնոգրի և սեփական խոսքի մասին խոսքի և մեջբերումների (1213 թվական - 1700 թվական), Գեորգի Գեորգի, Թբիլիսի, Թբիլիսի, 1897, թ. 201։

⁵ Հայաստանի հարակից երկրների պատմություն, հտ. II, էջ 337։

⁶ P. Purton, A History of the Late Medieval Siege, Woodbridge, 2010, pp. 178-181, տե՛ս նաև Руи Гонсалес де Клавихо, Дневник путешествия в Самарканд ко двору Тимура (1403-1406), Москва, 1990, с. 72, 155, 159, 160, տե՛ս <https://runivers.ru/lib/book3067/9675/> (5/11/2022)։

⁷ Յ. Մյեսնիս, մեջբերում Երևանում, Թբիլիսի, 1954, թ. 30, (տե՛ս նաև С. Какабадзе, Хроника ксанских эриставов начала XV в., - Письменные памятники Востока, «Историко-филологические исследования», Ежегодник 1968, Москва, 1970, с. 118։

կողմից վավերացված Մցխեթի կաթողիկոսության ապահարկության մասին հրովարտակում. «Գեորգի թագավորի ժամանակներում, եւ նրա թագավորության եւ հովանավորության ժամանակ այնտեղ [այսինքն՝ Վրաստան] եկան անարդարները եւ բոլոր երկրների հողերի տերը [Լենկ Թեմուրը]: ... Թեմուրը բազում ու անհամար ուլուսներով, եւ ներխուժեցին Վրաստան, եւ շատ հոգիներ սրախոխողոդ եղան բերաններից. քրիստոնյաների հիմքն ու լուսավորիչը, Մցխեթի գահը»¹:

Անթվակիր հայկական ձեռագիր հիշատակարաններից մեկի հաղորդմամբ՝ Գեորգի VII-ի կառավարման հավանաբար առաջին տարիներին Վրաստանը խորին խաղաղության մեջ էր. «Արդ զամենայն վիշտս եւ զաղետս կսկծելիս ո կարէ պատմել զերկնահանգէտ սուրբ աթոռիս, ցապառելն յիշխանաց եւ ի հոգեկիր արանց, թափուր եւ դատարկ ի փարթամ արգասեաց: Արդ, գրեալ եղեւ սա ի ժամանակս թագաւորութեան Գեորգեա որդոյ Բագրատ յաղթող եւ հզօր արքայի, զի յաւուրս սորա եղեւ. խորին խաղաղութիւն կողմանն Վրաց, ձեռամբ Յովաննիսի եւ Յովաննիսի սիրասնունդ աշակերտի»²:

Ըստ ձեռագրի՝ Հայաստանը «ցապառելն յիշխանաց արանց», ինչը կրկին փաստում է, որ XIV դարի երկրորդ կեսից սկսած հայ ֆեոդալական տները հետզհետե կորցնում են իրենց իշխանական դիրքերը: Հայ ֆեոդալներից շատերը իրենց կալվածքներից չգրկվելու համար ընդունում էին մահմեդականություն, մի մասն էլ դիմադրում էր՝ վերածվելով մանր հողատերերի կամ փորձում իրենց առեւտրի ասպարեզում³: Նկատենք նաեւ, որ ստեղծված իրավիճակից ելնելով՝ հայ ֆեոդալական ներկայացուցիչների մի մասն էլ պատասպարվել է Վրաստանում: Այդպիսի ընտանիքներից մեկն էր Սյունյաց Օրբեյանների Բուրթեյան ճյուղը, ում ձեռքում էր կենտրոնացած Սյունյաց նահանգի գավառների հոգեւոր եւ աշխարհիկ իշխանությունը⁴: Բուրթեյան տան ներկայացուցիչները ճանաչված էին նաեւ Սյունիքի սահմաններից դուրս: Այսպես, Բուրթել Օրբեյանը (1306-1344 թթ. Սյունյաց մեծ իշխան), ով Ստեփանոս Օրբեյանի եղբորորդին էր, հիշատակվում է նաեւ որպէս «...Վրաց թագազարմ իշխան»⁵: Նկատենք, որ Բուրթել Օրբեյանի հաջորդ սերունդները եւս շարունակում էին վայելել վրաց իշխանությունների հավատարմությունը՝ հնարավորություն ունենալով պատասպարվելու հենց այնտեղ: Թովմա Մեծուփեցու

¹ ქართული სამართლის ძეგლები, ტ. III, თბილისი, 1970, გვ. 187.

² Հայաստանի հարակից երկրների պատմություն, հտ. II, էջ 337:

³ **Զ. Փափազյան**, Հողվածներ, հտ. I, Երեւան 2020, էջ 377:

⁴ Այս մասին մանրամասն տե՛ս Լեւոն Խաչիկյան, Աշխատություններ, հտ. Բ, Երեւան, 2017, էջ 7-40, տե՛ս https://www.matenadaran.am/ftp/el_gradaran/Khachikyan,B.pdf (11/05/2022):

⁵ ԺԴ դարի հայերեն ձեռագրերի հիշատակարաններ, էջ 297:

հաղորդմամբ՝ Սմբատ Օրբելյանը օգտվելով այն հանգամանքից, որ Կարա-Յուսուֆը զբաղված էր Աղ-կոյունյունների դեմ պատերազմով, դաշնակցում է Մուլթան Ահմադի¹ հետ ընդդեմ Կարա-Յուսուֆի² (1389-1420)³: Սակայն 1410 թ. Ահմադը սպանվում է, իսկ Սյունիքում Սմբատի կալվածքները բռնագրավվում են: Սմբատը ստիպված պատսպարվում է Վրաստանում, ավելին՝ 1412 թ. ձեռագրում Սմբատը եւ իր որդի Բեշքենը հիշատակվում են նաեւ որպէս Գորիի մոտակայքում գտվող Ուփլիսցիխե գյուղաքաղաքի իշխաններ⁴:

Լենկ Թեմուրի եւ Կարա-Յուսուֆի պարբերաբար կրկնվող արշավանքներից եւ ավերածություններից հետո Հայաստանը մոտ 10 տարի՝ մինչեւ 1420 թ., խաղաղ դրության մեջ էր⁵: XV դարում հայ աշխարհիկ ֆեոդալականությունը որպէս որոշակի քաղաքական ուժ դադարել էր գործել⁶: Հետեւաբար երկրի սոցիալ-տնտեսական կյանքը շարունակում էր գտնվել անմխիթար վիճակում: Բացի այդ Հայաստանում հայ բնակչությունը խիստ նվազել էր, դրան գուզահեռ բնակչության կազմը փոփոխվել էր՝ Լենկ Թեմուրի կողմից տեղում բնակեցվում էին քոչվոր ցեղեր⁷, ինչը գրեթէ անհնար էր դարձնում որեւէ տնտեսական առաջընթաց: Հարկ է նշել, որ բնակչությունը խիստ նվազել էր նաեւ Վրաստանում, այսպէս՝ ըստ Պարսկաստանի Մուլթանիա քաղաքի արքեպիսկոպոս եւ դեպքերի ժամանակակից Հովհաննես դե Գալոնիֆոնտիբուսի՝ «Վրաստանը քննարկվող ժամանակաշրջանում խիտ բնակեցված չէր, այստեղ ապրում էին վրացիներ, հայեր, սարացիներ եւ հրեաներ, ովքեր զբաղվում էին առեւտրով»⁸: Նկատենք, որ քննարկվող ժամանակաշրջանում, Վրաստանում առևտրի գոյությունը պայմանավորված էր Արևելյան Վրաստանի, մասնավորապէս Տփղիսի, առևտրի տարանցիկ ուղիների վրա գտնվելու հետ: Հայտնի է, նաև, որ Լենկ Թեմուրը ձգտում էր իր ձեռքում կենտրո-

¹ Իրանում ձևավորված մոնղոլական անկախ ավատական պետություններից մեկի Ջելայիրյանների (1340-1432) առաջնորդ: Այս մասին մանրամասն տե՛ս Վ.Բայբուրդյան, Իրանի պատմություն, Երևան 2005, էջ 266-270:

² Թուրքմենական (կարա կոյունլու ցեղամիության առաջնորդ Կարա Յուսուֆն էր: Այս մասին մանրամասն տե՛ս Վ.Բայբուրդյան, նշվ.աշխ., էջ 277-290:

³ **Թովմա Մեծոփեցի**, նշվ.աշխ., էջ 46:

⁴ ԺԵ դարի հայերեն ձեռագրերի հիշատակարաններ, Կազմեց Լ. Ս. Խաչիկյան, հտ. I (1401-1450 թթ.), Երևան, 1955, էջ 133:

⁵ **Margaryan G.**, Quelques remarques sur l'histoire économique-fiscale de l' Arménie en période post-ilkhanide, AJNES (ARAMAZD), volume IX, 2015, p. 130.

⁶ **Հ.Փափազյան**, նշվ.աշխ. էջ 377:

⁷ **Հ. Մանանդյան**, նշվ.աշխ., էջ 372-373:

⁸ **A. Kern**, "Libellus de notitia orbis" Johannes' III (de Galonifontibus?) O. P. Erzbischof von Sul-tthanyeh, Roma, 1938, p.113.

նացնել Այսրկովկասից դեպի արեւմուտք անցնող առեւտրական ուղիները¹: Այս պարագայում, Վրաստանը դիտելով որպէս տարանցիկ ուղի՝ Թեմուրը շահագրգռված էր պահելու այդ ներուժը իր ձեռքում: Այսմ՝ կարելի է բացատրել Քվեմո-Քարթլիի քայքայված, սակայն վերականգման ենթակա սոցիալ-տնտեսական կյանքը:

ՎՐԱՑ ԹԱԳԱՎՈՐՆԵՐԻ ՎԵՐԱԿԱՆԳՆՈՂԱԿԱՆ ՔԱՂԱՔԱԿԱՆՈՒԹՅՈՒՆԸ ԵՎ ՀԱՅԿԱՆԱՆ ՆՈՐ ԳԱՂԹԻ ԱԼԻՔԸ ՔԱՐԹԼԻ-ԿԱՒԵԹ

1412 թվականին գահ բարձացած Կոստանդին I-ի (1407–1412 թթ.) որդի Ալեքսանդր I-ին (1412–1442 թթ.)² հաջողվում է որոշակի լուծումներ տալ Վրաստանի առջեւ ծառայած մի շարք խնդիրներին: Նրա գլխավոր գործերից մեկը դարձավ երկրի ծայրաստիճան քայքայված տնտեսության վերականգնումը, իսկ ներքաղաքական կյանքում՝ միասնականության պահպանումը:

Լենկ-Թեմուրի ավերիչ արշավանքներից հետո Ալեքսանդր I-ը շինարարական եւ վերականգնողական լայն գործունեություն ծավալեց³: Վրաց արքան իր երկրաշեն գործունեությունն իրականացնելու համար յուրաքանչյուր ծխից տարեկան 40 թեթրիի չափով հրամայում է գանձել մալի կոչված հարկը⁴: Ալեքսանդր I կողմից Տփղիսի եւ Մցխեթի տաճարների վերականգման աշխատանքների մասին համառոտ տեղեկությունն է հաղորդում նաեւ մեր կողմից արդեն նշված Մցխեթի կաթողիկոսարանի հրովարտակը⁵: Երկրի տնտեսությանը զարկ տալու համար Ալեքսանդրը գիտակցում էր, որ նախ եւ առաջ պետք է լուծեր իր առջեւ ծառայած մեկ այլ խնդիր՝ խիստ նվազած Վրաստանի բնակչության համալրումը: Եւ բնակչության, ավելի ճիշտ թագավորահպատակ գյուղացիների թիվը մեծացնելու համար վրաց թագավորը սկսեց խրախուսել հայերի վերաբնակեցումը Վրաստան: Իրենց հերթին հայերը նրա մասին հատուկ ջերմությամբ եւ երախտագիտությամբ են արտահայտվում: Այսպէս, Վրաստանում հաստատված Դավիթ Քահանան նշում է. «...գոր Տէր Աստուած պահեսցէ զսա անփորձ կենաւք եւ պարագայց ամաւք՝ զարաւք իւրովք՝ ի վանումն եւ հերքումն անարիւնաց խըմբից եւ ի հաստատութիւն սրբոց ե-

¹ **Д. Кацитадзе**, Грузия на рубеже XIV-XV веков, Тбилиси, 1975, с.237.

² **Н. Ломоури**, Грузия, Тбилиси, 1966, стр. 29; **ო. ჯავახიშვილი**, *ქართველი ერის ისტორია*, წიგნი IV, თბ., 1951, გვ. 15-42.

³ **Д. Мшвениерадзе**, Строительное дело в древней Грузии, Тбилиси, 1952, стр. 56.

⁴ **Margaryan G.**, The Fiscal System of The Eastern Georgia in The Late Medieval Epoch.. Georgian Source-Studies, volume XVI, 2014, p.119.

⁵ ქართული სამართლის ძეგლები, დასახ ნაშრომი, გვ. 187.

կեղեցոյ»¹: Նկատենք, որ հայ քահանայի նման վերաբերմունքը պատահական չէր, քանի որ նա համարում էր Ալեքսանդրին այն քաղաքական ուժը, ում շուրջը կարող էին համախմբվել հայերը, ապա վկայում քննարկվող ժամանակաշրջանում Հայոց եկեղեցու համար ստեղծված բարենպաստ պայմանների մասին:

Հայերի ներկայության եւ նրանց հիմնական զբաղմունքի վերաբերյալ կարելուք տեղեկությունն է պարունակում «Քարթլիի, Կախեթի, Մեսխեթի կաթողիկոսական կալվածքների ապահարկության վավերագիրը»²: Վավերագրում կաթողիկոսական ունեցվածքների շարքում նշված է Բագարի (Ջագեմի)³ կոչվող բնակավայրը, ուր ապրում էր հայ եւ հրեա վաճառականների 27 տուն: Վրաց հետազոտող Թ. Ժորդանիան վավերագիրը թվագրում է 1392 թվականով⁴, որը, ըստ նրա, վավերացվել է Գեորգի VII-ի կողմից: Մեկ այլ հետազոտող Շ. Մեսխիան, այն թվագրում է XV դարի 40-ական թվականներով, իսկ վավերացումը վերագրում Ալեքսանդր I-ին⁵: Ս. Կակաբաձեն անդրադառնալով վավերագրին, հակված է կարծելու, որ այն հետագայում առանց փոփոխությունների արտագրվել և հաստատվել է Գեորգի VII-ի կողմից 1496թ.⁶: Ըստ հեղինակի նույն վավերագիրը արտագրվել և լրացումներով հաստատվել է Ալեքսանդր I-ի օրոք: Հայտնի է, որ Գեորգի VII-ի թագադրումը տեղի է ունեցել 1393 թ.⁷, հետևաբար Թ. Ժորդանիայի պնդումը, թե այն հաստատվել է 1392 թ. Գեորգի VII-ի կողմից, տարակուսելի է: Ավելին, վավերագրի վերջում հիշատակվում է Ալեքսանդր I թագավորի (1412–1442 թթ.) անունը, ուստի կարելի է համաձայնել Ս. Կակաբաձեին, որ նույն 1392թ. վավերագիրը հետագայում որոշ լրացումներով արտագրվել և հաստատվել են Գեորգի VII-ի և Ալեքսանդր I թագավորների կողմից: XV դարի ընթացքում տնտեսական աճի հետևանքով Կախեթում հայտնվեցին մի շարք քաղաքներ, որտեղ նկատվեց բնակչության արագ աճ⁸: Դրանց թվում էր Բագարի քաղաքը, որը քննարկվող ժամանակաշրջանում դարձել էր խոշոր վաճառաշահ քա-

¹ ԺՆ դարի հայերեն ձեռագրերի հիշատակարաններ, հտ I, էջ 487-488:

² Թ. Ջորձանია, დასახ ნაშრომი, გვ. 261.

³ П. Мурадян, Армянская эпиграфика Грузии, Картли и Кахети, Ереван, 1985, с. 54, տե՛ս նաև III. Месхия, указ. соч., с. 100.

⁴ Թ. Ջորձանია, დასახ ნაშრომი, გვ. 261.

⁵ III. Месхия, указ. соч., с. 100.

⁶ С. Какабадзе, Грузинские документы IX-XV вв., москва, 1982, с. 158-161, 101-107.

⁷ ჯავახიშვილი ივ. საქართველოს ისტორია: XI-XV საუკუნეები. თბილისი 1949, გვ. 209, გვრიტიშვილი დ., ნარკვევები საქართველოს ისტორიიდან (XIII-XIVსს.), თბილისი, 1962, გვ.; Հայաստանի հարակից երկրների պատմություն, հտ. II, էջ 337:

⁸ III. Месхия, указ. соч., стр. с. 100.

ղաք եւ որի բնակչության ստվար գանգվածը, ըստ վավերագրի՝ հայ վաճառականներն էին: Այդով կարող ենք համարել, որ 1392թ. վավերագրում Բագարիյում հայ վաճառականների մասին հիշատակությունը հավելվել է Ալեքսանդր I օրոք, երբ թագավորը հաստատեց այն:

1436 թ. հայկական ձեռագիր հիշատակարանի համաձայն՝ Ալեքսանդր I-ի օրոք Գանձակ քաղաքից մեծ թվով հայեր հաստատվում են Կրծանիս գյուղում¹: Հարկ ենք ենք համարում մեջբերել ամբողջական հիշատակարանը՝ լուսաբանելու համար որոշ պատմական հարցեր: Ըստ Հովհաննես գրչի.

«Գրեցաւ սայ ի թվականիս Հայոց ՊՁԵ (1436), ի յաշխարհս Վրացտան, ի մայրաքաղաքիս Տփիսեաց, մերձակայ գեղս Կրծանիս, ընդ հովանեաւ կաթուղիկէ սուրբ Աստուածածնիս եւ այլ ամենայն սուրբ եկեղեցեացս ... ի թագաւորութեան Վրաց Ալեքսանդրին, ի նեղ եւ ի դառն ժամանակիս, որ վասն իմ ծովացեալ մեղացն եկն չար անաւրէն Շաղոռլիսն, ու մեծ աւերումն [արար] աշխարհին: Ապայ գնացաք ի տեղիքն երախտեաց՝ Երուսաղէմ, եւ համբուրեցաք գտուրբ գերեզմանն, եւ այլ ամենայն սուրբ տնաւրիսականքն: Յետ գալն՝ ի Դմրշիսայ զգրոցս թուխթն եւ այլ գրանց առաք, եւ եկաք բերաք ի Վրացտուն: Թողաք զթուղթս ու գնացաք ի Գանձակ, մեր եղբար եւ ընդանացն կարաւտ էաք: Այլ չարիքն ու պատուհասն անաւրէն ջաղաթին նեղեցուց զմեզ, այլ մեք առաք զմեր եկեղեցոյ հանդերձն՝ շուրջառնէր, զԱւետարան, ու զգրանք, ու զբուրվառ, եւ զայլ ամենայն հոգոյ եւ մարմնոյ զինչ որ կայր՝ զամեն առաք, ի Վրացտուն կու գայաք բազում կարվան...: Յիշեցէք զՄարգիս արեղէն Տփիսե[ա]յ կաթուղիկին աւագերեցն... այլ եւ զհամշիրայ հոգեւոր եղբայրքն իմ՝ զՅորդանան արեղայն եւ **զՍտեփաննոս քահանայն Կրծանեցին**...: Քանզի անարժանս Յոհաննէս՝ անուամբ եւ ոչ գործաւք քահանայ, ըստացայ...»²:

Նկատենք, որ Կրծանիս գյուղում Մբ. Աստվածածին եկեղեցու առկայությունն անհերքելի է դարձնում այն փաստը, որ այստեղ մինչև XV դարը եղել է հայկական համայնք: Քահանա գրիչը ուխտագնացության է գնում Երուսաղէմ, և գրչագրերի թուղթ ու այլ պարագաներ թողնելով Կրծանիսում, գնում է Գանձակ, որտեղ ապրում էին իր եղբայրները: Ամենայն հավանականությամբ, ձեռագրի հեղինակ Հովհաննեսն ավելի վաղ բնակություն է հաստատել Վրաստանում, իսկ եղբայրները շարունակում էին ապրել Գանձակում: Ձեռագրում վկայված է, որ Գանձակը ենթարկվում է Ջաղաթի իլխանի հարձակմանը, որի պատճառով Հովհաննեսն իր

¹ Թ. Խ. Հակոբյան, Ստ. Տ. Մելիք-Բախշյան, Հ. Խ. Բարսեղյան, Հայաստանի եւ հարակից շրջանների տեղանունների բառարան, հտ. 3, Երևան, 1991, էջ 255:

² ԺԵ դարի հայերեն ձեռագրերի հիշատակարաններ, էջ 461-462:

եղբայրների եւ մի մեծ քարավանի հետ բռնում է գաղթի ճանփան դեպի Վրաստան: Կրծանիսում գաղթականները արժանանում եւ մեծ հոգատարության: Ձեռագրի վերջում Հովհաննէսը շնորհակալությունն է հայտնում իր հոգևոր եղբայրներին՝ Հորդանան արեղային, «գՍտեփաննոս քահանայն Կրծանեցուն» եւ «գԿրծանեց գամենայն ժողովուրդն»: Ամենայն հավանականությամբ ձեռագրի թյուրբմբոնան արդյութում վրաց հետազոտողներ Շ. Թեթեւաձեն եւ Օ. Թեթեւաձեն եկել են այն եզրահանգման, թէ ձեռագրի վերջում Հովհաննէսը երախտագիտություն է հայտնում տեղի վրաց ժողովրդին¹: Հարցին այս տեսանկյունից նայելով՝ մի կողմ է դրվում Կրծանիսում մինչեւ XV դարը հայերի եւ հայկական համայնքի գոյության փաստը: Ուստի չանտեսելով վրաց ժողովրդի աջակցությունը եւ ներկայությունը Կրծանիսում, պետք է ընգծել, որ ըստ ձեռագրի՝ Կրծանիսի հայ բնակչությունն է՝ Ստեփանոս քահանայի գլխավորությամբ առաջինը ձեռք մեկնել իր հայրենակիցներին:

Ալեքսանդր I-ի օրոք հայերով շարունակում է համալրվել նաեւ Վարդիսուպանի գյուղը²: Այսպես, ըստ ձեռագրի հիշատակարաններից մեկի.

«Քրիստոս Աստուած... ջնջեա զձեռագիր յանցանաց իմոց՝ գեղկելի Կարապետ արեղայիս, ...Եւ զհայրեղբարս իմ զԱկոբ, եւ գամուսինն իւր զԱյմելիքն, եւ գորդին իւրեանց Աշայն... Քմիկս, որ շատ կու ծառայէ մեզ, եւ ամենքեան արինեալ Աստուածոյ ի մէնջ, ամէն: Գրեցաւ զիրս ի թվականի Հայոց ՊՁԷ [1438 թ.] Էր, ի Մուխրանիս, ընդ հովանեաւ սուրբ Աստուածածնիս, ի գեղս, որ կոչի Վարդիսուպան. երախտաւորք մեր արինեալ եղիցի[ն], ամէն»³:

Ձեռագրից պարզ է դառնում, որ Կարապետը ծագում է հոգեւորականների ընտանիքից. հայրը եղել է քահանա, եւ ինքը եւս հոգեւորական էր: Կարապետն իր ընտանիքով գաղթել է Վարդիսուպան գյուղ, որտեղ էլ իրենց օգնել են իր ուսուցիչ տեր Մարգիսը, հորեղբայրը եւ մյուս հարազատները, ովքեր ավելի վաղ էին հաստատվել Վարդիսուպանում: Նկատենք, որ Սբ. Աստվածածին եկեղեցու գոյությունը հավաստում է, որ մինչեւ 1438 թ. Վարդիսուպանն ունեցել է կազմակերպված հայկական համայնք: Այստեղ եւս, վրաց հետազոտողներն ընդգծում են վրաց ժողովրդի գրկաբացությունը փախստական հայերի նկատմամբ⁴: Պետք է նշել, որ ձեռագրում անդրադարձ չկա հայերին վրաց ժողովրդի ընդունելու կամ

¹ **III. Тетвадзе, О. Тетвадзе**, Армяне в Грузии, (с древних времён до сегодняшнего дня), Тбилиси 2008, с. 24: Այսուիես՝ Армяне в Грузии:

² Հայաստանի եւ հարակից շրջանների տեղանունների բառարան, հտ. 4, էջ 785:

³ ԺԵ դարի հայերեն ձեռագրերի հիշատակարաններ, էջ 489:

⁴ Армяне в Грузии, с. 24.

վրացիների առանձնակի վերաբերմունքի մասին: Կարապետը պարզապես շնորհակալություն է հայտնում իրեն բոլոր օգնողներին եւ առանձնաբար հիշատակում ազգությամբ հայ եւ Վարդիսուպանի բնակիչ իր ազգականներին:

Ալեքսանդր I-ի օրոք Վրաստանում շարունակում էին ապրել նաեւ մեծանուն հայերը. այսպես, 1438 թ. ձեռագիր հիշատակարանից իմանում ենք, որ այդ Ավետարանի պատվիրատուն է եղել «խոճա» (մեծանուն) ճանազիզ Տփղիսեցին, ով իր ծնողների հետ մեկնել է Երուսաղեմ եւ այստեղ «բազում արդիւնս արար ի յաղքատս եւ ի կրանաւորս յեկեղեցիս»¹:

1440 թվականին Վրաստանը ենթարկվեց կարա-կոյունլու Ջահանշահի (1437-1467) ներխուժումներին. Ալեքսանդր I-ը մերժեց թշնամուն հնազանդվելու եւ հարկ վճարելու առաջարկը, եւ թուրքմենների բանակը ներխուժեց Վրաստան²: Թշնամին նախ գրավեց ու ավերեց Մամշվիլդեն, ապա Տփղիսը: Վրաց բնակչության հետ միասին մեծ կորուստներ էին կրում նաեւ տեղի հայ բնակիչները. այսպես, միայն Ջահանշահի դեպի Վրաստան արշավանքի ժամանակ ավելի քան 12000 հայ զերի է ընկնում, որոնց մի մասը սպանվում է³:

Չնայած այս ամենին հայերի հոսքը դեպի Վրաստան եւ այստեղ բնակվելու ձգտումը շարունակվում է նաեւ Ալեքսանդր I-ի որդիների օրոք: Ալեքսանդրին հաջորդեցին որդիները՝ Վախթանգ III-ը (1442–1446 թթ.) եւ Գիորգի VIII-ը (1446–1466 թթ.): 1448 թ. վերջինիս կողմից հաստատված «Մցխեթի կաթողիկոսության» տրված հրովարտակից պարզ է, որ Մցխեթի շրջակա գյուղերից մեկում՝ Ծիլկանիում⁴, եղել է հայկական թաղամաս, որը եւս նվիրվել է Մցխեթի կաթողիկոսարանին.

«Մենք... երկու գահի՝ Լիխիի լեռնաշղթայի երկու կողմի տիրակալը՝ Գիորգի թագավորը... տեղեկացնում եմ (Մցխեթին) ամեն ինչով, պալատով, եկեղեցով, գյուղացիներով, ծառաներով... Կիսաուրն իր կալվածքով, մի հիշատակարանով (Ղազարեի տոնի ժամանակ) կատարեցեք (եւ մյուս վեց հիշատակարան) եւ Ծիլկանիի հայերի թաղամասը (նվիրում ենք)... Սա գրվել է Քոռոնիկոն «Ռվլ»-ին, մեր թագավորի արքայության երրորդ տարին, մեր դպիր Կլիմի Կակլաչաձեի ձեռքով»:

Վերջին ստորագրությամբ՝ «Եւ, Գիորգի թագավոր հաստատել եմ Աստծո կամքով»⁵:

¹ ԺԵ դարի հայերեն ձեռագրերի հիշատակարաններ, հտ I, էջ 494:

² Հայաստանի հարակից երկրների պատմություն, հտ II, էջ 338:

³ Դիւան Հայոց Պատմութեան, Գիրք Ժ. Խմբ. Գիւտ Աւագ Քահանայ Աղանեսանց, Թիֆլիս, 1912.

⁴ *ქართლის ცხოვრების ტოპოარქეოლოგიური ლექსიკონი*, გ. გამყრელიძე, დ. მინდორაშვილი, ზ. ბრაგვაძე, მ. კვაჭაძე და სხვ., თბ, 2013, გვ 601.

⁵ *თ. ჟორდანიას*, დასახ ნაშრომი, გვ. 261.

XV դ. ընթացքում Վրաստանում սկսվում է միասնական թագավորության քայքայման գործընթացը, որն առավելապես պայմանավորված էր Վրաստանի վատթարացած արտաքին քաղաքական դրությամբ եւ միաժամանակ երկրի քաղաքական մասնատվածությամբ: XV դարի վերջում Վրաստանը բազմիցս ենթարկվեց թյուրքական ցեղերի հաձակումներին, ինչի արդյունքում վրացական առանձին շրջաններ դարձան սնանկ¹: Բնականաբար, այդ արշավանքներից մեծ վնասներ էին կրում նաեւ հայերը, արդյունքում նրանց թիվը Վրաստանում գնալով նվազում էր: Այսպես, գրիչ Ալեսիանուր հիշատակում է, որ 1477 թ. Ուզուն-Հասանի դեպի Վրաստան արշավանքի ժամանակ նա իր եղբոր հետ «եկաք ի Քթիշոյ վանքըս, զի թուրք ազգս բազմագացեալ է եւ հայս նուազեալ...»²:

1461 թ. Տրապիզոնի կայսրության փոխարեն Վրաստանի անմիջական հարեւան էր դարձել Օսմանյան պետությունը, որը սպառնում էր Վրաստանին ինչպես հարավ-արեւմուտքից, այնպես էլ հյուսիս-արեւմուտքից³: Արդյունքում, Մեւ ծովում Օսմանյան պետությունը ամբողջ առեւտուրը կենտրոնացնում է իր ձեռքում, որը շատ ծանր հետեւանքներ ունեցավ Վրաստանի արեւմտյան շրջանների համար: Մյուս կողմից էլ աշխարհագրական հայտնագործություններից հետո (ծովային ճանապարհը դեպի Հնդկաստան Աֆրիկայի շուրջ, Ամերիկայի հայտնագործումը) դադարեց գործել Եւրոպայից դեպի Հնդկաստան առեւտրական ճանապարհը, որն անցնում էր Այսրկովկասի եւ Միջին Ասիայի երկրներով, առեւտրական ուղիները տեղափոխվեցին դեպի հյուսիս (Մալիտակ ծով – Արխանգելսկ – Մոսկվա – Աստրախան – Իրան)⁴: Հետեւաբար հայերի թվի նվազումը Վրաստանում կարելի է պայմանավորել նաեւ նրանով, որ Վրաստանով անցնող առեւտրական ուղիները կորցրեցին երբեմնի նշանակությունը եւ երկիրը զրկվեց տարանցիկ առեւտրի միջնորդի իր ավանդական դերից: Ի վերջո, 1490 թ. Վրաստանը բաժանվում է երեք թագավորությունների՝ Քարթլիի, Կախեթի, Իմերեթի, ինչպես նաեւ Սամցխեի կիսանկախ աթաբեկության: Քարթլիում գահ է բարձրանում Կոստանդին II-ը (1490-1505 թթ.), Կախեթում՝ Ալեքսանդր I-ը (1476-1511 թթ.), Իմերեթում՝ Ալեքսանդր I-ը (1483-1510 թթ.)⁵:

¹ III. Месхия, указ.соч., с. 91.

² ԺԵ դարի հայերեն ձեռագրերի հիշատակարաններ, հտ III, էջ 460:

³ Հայաստանի հարակից երկրների պատմություն, հտ. II, էջ 338:

⁴ Н. Бердзенишвили, указ.соч. с. 21; А. Манандян, О торговле и городах Армении в связи с мировой торговлей древних времен, Ереван, 1954, с. 307-309.

⁵ R. Grigor Sunny, The making of the Georgian nation, Indiana university press, 1994, p. 45-46.

ԵԶՐԱԿԱՑՈՒԹՅՈՒՆ

Ի մի բերելով վերը շարադրածը՝ կարող ենք եզրակացնել որ XIV-XV դդ. ընթացքում, Հայաստանի տնտեսական եւ քաղաքական կյանքի անկման պայմաններում, հայ բնակչությանը բռնում է գաղթի ուղին: Այս գործընթացի աջակից են լինում նաև վրաց թագավորները՝ քաղաքային կյանքի կազավորումով՝ այստեղ, ինչպես նաև գյուղերում հայերին բնակեցնելով, առևտրի համար նպաստավոր պայմաններ ստեղծելով, մնացյալ հայ իշխանական տան ներկայացուցիչների իշխանի տիտղոսը պահպանելով: Որպես այս ամենի արդյունք հայերը ձեռք էին բերում կեցության հնարավորություն, իսկ վրաց կենտրոնական իշխանությունը փորձում էր լուծել իր առջև ծառայած դեմոգրաֆիկ եւ տնտեսական խնդիրները:

Лилит Меликян, Политико-экономические предпосылки для переселения новых групп армянского населения в Картли-Кахети - Статья посвящена анализу политических и экономических предпосылок в Грузии для переселений армянского населения в Картли-Кахети. Известно, что в XIV-XV вв. в Армения и Грузия были вовлечены в борьбу между монгольской державой, Золотой Ордой и государством, созданным Ленком Темуром. В этот период проявление внешних воздействий создает невыносимые условия для проживания в Армении. В ожидании более благоприятных социально-экономических и политических условий армяне массово покидают родину, расселяясь в разных странах, в том числе в Грузии, в частности в Картли-Кахети.

Исследование основано на рукописных источниках Матенадарана имени Месропа Маштоца и грузинских документах. Автор предпринял попытку представить общественно-политическую и экономическую жизнь Армении и Грузии XIV-XV вв. через сравнительно-исторический метод. Особое внимание было уделено политике грузинских царей по отношению к армянам и освещению вытекающих из нее последствий. Рассмотрены деятельность и роль новых переселенцев армян и их роль в социально-экономической и политической жизни Грузии. В статье также рассматриваются демографические проблемы, возникшие в Грузии, и политика грузинских царей направленное на их решение.

Lilit Melikyan, Political and economic prerequisites for the settlement of new groups of the Armenian population in Kartli -Kakhet - The article is devoted to the analysis of political and economic prerequisites in Georgia for the resettlement of the Armenian population in Kartli-Kakheti. It is known that in the XIV-

XV centuries, Armenia and Georgia were involved in the struggle between the Mongol power, the Golden Horde, and the state created by Lenk Temur. In this period, the manifestation of external influences creates unbearable conditions for living in Armenia. Expecting more favorable socio-economic and political conditions, Armenians leave their homeland en masse, settling in different countries, including in Georgia, particularly in Kartli-Kakhet.

The study is based on manuscript sources of Matenadaran named after Mesrop Mashtots and Georgian documents (XIV-XV). The author attempted to present the social-political and economic life of Armenia and Georgia in the XIV-XV centuries through the comparative-historical method. Special attention was paid to the policy of the Georgian kings in relation to the Armenians and the shedding light on its consequences. New Armenian immigrants' activity and role in the socio-economic and political life of Georgia have been considered. The article also discusses the demographic problems that have arisen in Georgia, and the policy of the Georgian kings aimed at solving them.

Ուղարկվել է խմբագրություն 19.09.2022թ.

Գրախոսվել է 30.09.2022թ.

Ստորագրվել է տպագրության 02.10.2022թ.